

萬有文庫

第二集七百種

王雲五主編

行水金鑑

(五)

傅澤洪錄

商務印書館發行

行水金鑑

(五)

傅澤洪錄

國學基本叢書

行水金鑑卷第二十六

河水

明世宗嘉靖四十五年六月癸酉河決馬家橋等處新隄總理河道尙書朱衡都御史潘季馴以聞工部議覆請令衡等亟爲經理仍及水盛之時親詣黃河上流督率有司視某處故道可復某處新河可開務圖上策以弭後患從之十一月壬午總理河道都御史潘季馴以憂去吏部言治河尙書朱衡心計精明足當大任今河業已有緒宜卽以河道事使衡兼之待其遷轉之日仍舊復設河道都御史報可

明世宗實錄

是年黃河復決沛縣飛雲橋二三等鋪東流衝運河亦由湖陵城口入湖坡平地水盈丈許上下百里漕渠無迹九月馬家橋隄成障水使之南趨秦溝冬沛縣水斷流

續文獻通考

時河盡北徙決沛之飛雲橋橫截逆流東行踰漕入昭陽湖泛濫而東平地水丈餘散漫徐州從沙河

至二洪浩渺無際而河變極矣

明紀事本末

乙丑公以久次擢南京刑部尙書會河決徐方運道湮塞上憂之改工部尙書兼右副都御史總理河漕公日夜馳至徐方率四部人吏行視河所決道漲爲平陸浚之沙隨水壅淖不可足其旁橫流汗漫

舟行樹杪力無所施則下令吏民父老有能以河事獻者立召見口對久乃得新渠規度焉。于慎行作鑑山朱公行狀

公名衡字士南萬安人嘉靖壬辰進士新渠詳見運河

公晉都察院右僉都御史總理河道乙丑河決沛縣破三沽閘漕道爲梗議者言欲徙閘夏鎮從南陽至留城出茶城口就高卽避漫流便天子以爲然命大司空衡督理以公副公分工受事躬行畚鍤間十旬竣事省原估三之一尋丁內艱河工成詔褒錄公晉右副都御史申時行撰宮保傳書潘公季嗣傳

黃決沛縣之飛雲橋穀亭沙河留城境山一帶河渠盡塞公遡流而西問故道於土老篙師喟然歎曰漢瓠子之役沉璧投馬不過曰復江南舊跡而已其後賈魯亦一切以復故爲主宜仍三沽故道便而夏鎮業有成議遂躬行督相不三旬告成。王錫爵撰印川潘公墓志

乙丑補工科給事中先是河決曹縣防河使者疏請開趙皮寨孫家渡以殺水勢特遣侍郎吳鵬都御史曾鈞董其役公上書極陳關係祖陵周藩至急乃不果開至是當事者仍議徐沛運道淤平宜亟開汴河以疏黃水漫流公援證往事反覆辨其不可大略謂汴河肇開自隋下通宿泗而達廣陵數百年來湮沒殆盡卽欲開鑿糜費不貲使開之水卽行勢必南走泗州寢園可虞使開之水不至匪徒無益誤奪時日運道之治反後已時諱其言開汴之議竟寢晉尙寶司少卿程紹作徐公傳按公名自得雍丘人嘉靖辛丑進士

明穆宗隆慶元年正月甲申先是河決沛縣議者請修復運河故道乃勘議新集郭貫樓等處上源已而

總理河道尙書朱衡言。古之治河。惟欲避害。而今之治河。又欲資其利。故河流出境山以北。則閘河淤。出徐州以南。則二洪涸。惟出自境山至徐州小浮橋四十餘里間。乃兩利而無害。自黃河橫流。碭山郭貫樓支河皆已淤塞。改從華山分爲南北二支。南出秦溝。正在境山以南五里許。此誠運河之利也。惟北出沛縣西。及飛雲橋。逆上魚臺。爲患甚大。聖慈不忍沛縣魚臺之民。橫罹水災。拳拳欲開故道。臣等仰體聖心。亦有勘議上源之請。但考之地形。參之輿論。其不可者有五。自新集至兩河口。皆平原高阜。無寸尺故道。可因。卽欲濬深。無異穿井。郭貫樓至龍溝一帶。頗有河形。又係新淤。無可駐足。譬諸取飴於罌。隨取隨滿。其不可一也。黃河所經。鮮不爲患。由新集則商虞夏邑受之。由郭貫樓則蕭碭受之。今改復故道。則魚沛之禍。復移蕭碭。其不可二也。黃河西注華山。勢若建瓴。又無涯涘。欲從中鑿渠。挽水南向。必當築壩橫截。遏其東奔。於狂瀾巨浸之中。築數里之壩。爲力甚難。其不可三也。役夫三十三萬。曠日持久。勞民於旣疲之餘。徼功於難必之地。騷動三省。其不可四也。大役踵興。工費以數百萬計。匱乏之後。措置無策。一有不繼。前功盡隳。其不可五也。臣以爲上源之議可罷。惟開廣秦溝。使下流通行。修築南長隄。以防奔潰。可以甦魚沛昏墊之民。工部請從衡議。上曰可。二月甲午。總理河道工部尙書兼都察院右都御史朱衡奉詔自陳乞休。不允。十一月丁卯。陞刑部浙江司郎中。方良曙爲河南按察使。副使治河。明穆宗實錄

明穆宗隆慶二年六月乙酉。總理河道漕運工部尙書兼都察院右副都御史朱衡以疾乞休。不允。九

月己巳命總河尙書朱衡回部。庚午起服闋都察院右副都御史翁大立以原職總理河道。十月戊戌詔以兩淮運司挑河銀三千兩發徐呂二洪協濟河夫之費從總理屯鹽都御史龐尙鵬奏也。明穆宗實錄

明穆宗隆慶三年二月庚子總河都御史翁大立奏言國家張官置吏爲治河計至詳密矣然往往能收臨患焦爛之功而未有先事徙薪之策以懲怠擊惰之法大疎也稽之律令凡失時不修隄防者罪止笞杖是以當事者率漫然視之請自今更令隄防不効者府佐及州縣正官俱以差降級并管河副使與職專守巡者俱治罪工部覆行其言因陳漕渠視黃河以爲通塞黃河變遷自古不常乞并敕大立及時疏濬下流建築遙隄以備之報可。七月壬午河決沛縣自考城虞城曹單豐沛抵徐俱罹其害漂沒田廬不可勝數漕舟二千餘皆阻邳州不得進總理河道都御史翁大立以聞工部尙書朱衡覆奏茶城淤塞宜俟水退乃可疏濬獨徐沛災民流移困苦宜令戶部亟議賑濟以安人心戶部覆如衡言請以淮揚商稅及撫按贖贖備賑倉糧賑卹貧民仍敕河道諸臣設法疏濬支渠或置船盤剝勿令漕舟阻滯上是之。庚寅工科都給事中嚴用和言黃河再溢震蕩徐沛運道爲梗宜飭所司塞決口挑濬淤沙以紓目前之急其治河經久之策宜行河道及撫按官悉心計處於是工部言今河流稍平漕舟以次而進其諸隄堰閘壩可以漸修無足爲慮惟沛縣黃水之橫溢倏去倏來則民命不堪秦濁河口之淤沙隨疏隨壅則運道終阻誠宜及時講求爲一勞永逸之計然臣以爲黃河爲患自周漢至今未有能久治而不決之術

要在因勢利導。隨敝修補而已。今沛縣東隄已完。而縣城南至境山西隄未及舉修。宜亟加興築。以遏沛河之溢。其秦濁二河。易淤難疏。宜於梁山之南。別開一渠。遠避黃水。以免沙淤之患。計無便於此者。至欲多開故道。以殺河勢。則臣以爲不可。夫漢武力罷於瓠子之工。宋人禍基於回河之役。卽嘉靖中開濬孫家渡等處。費出不貲。旋即壅塞。未有能出奇策。使河受約束者也。上是其言。己亥。總河翁大立奏。洪水爲患。在北則廣。大河間。在南則淮揚。徐沛。在河南則開歸彰衛。在山東則兗濟。東昌人民。罄罄愁苦萬狀。宜令戶部轉行漕司。以最後漕糧收貯徐州廣運倉。平價出糶。以救災民。及他州郡。咸議蠲卹。則可以活數百萬之命。時工科都給事中嚴用和亦以爲言。戶部覆請留漕糧三萬石賑濟。工部請行河道諸臣及時繕修隄閘壩堰。其茶城西岸。曹單河隄。以屬大立。南直隸淮河河口等處。山東臨清德州等處。河南虞城夏邑等處決口。屬各巡撫經理。務刻期竣事。上皆從之。八月丁巳。總理河道都御史翁大立請發河南山東淮揚河夫椿草銀一萬兩。預糴粟麥貯之倉庾。以備明年河工。及賑濟之用。從之。庚申。以洪水爲患。命總河翁大立祭大河。大濟之神。巡撫鳳陽侍郎趙孔昭祭大江。大淮之神。九月丙子。總河翁大立言。陛下念濱河之民。重罹水災。特下蠲租之令。更發內帑以賑之。不勝大幸。願閭閻窮苦之狀。宮禁遽遠。有不盡見聞者。臣謹繪圖十二以獻。一曰水次兗軍。二曰漕河築隄。三曰黃河驟漲。四曰昏夜守隄。五曰糧船過洪。六曰黃河捲埽。七曰茶城撈淺。八曰洪水衝城。九曰風雨異常。十曰海潮嘯溢。十一曰災民避

水十二曰糧船漂沒險阻艱難備載之矣陛下惠然省覽知大官之膳餼皆軍民膏血必有惻然傷之者且今時事可深慮者五東南財賦之藪而江海泛濫粒米不登鞭撻雖加徒隕民命此京儲可慮一也邊鎮關隘洪水衝激墩堡傾頽何恃以守此虜患可慮二也直隸山東河南皆股肱之郡霖雨旣久城郭不完積貯空虛振貸無策卒有寇盜何以備之此內地可慮三也海徼之間颶風鼓浪兵船戰士悉被漂沉此海防可慮四也淮浙產鹽之場鹹泥盡衝圍竈盡廢此國課可慮五也願陛下以此五患十二圖召公卿輔弼之臣與共計之求所以消弭變異者無爲文具上以圖留覽下其章於所司

明穆宗實錄

是年七月河水溢自清河抵淮安城西淤者三十餘里決方信二壩出海平地水深丈餘寶應湖隄崩壞山東莒郟諸處水溢從沂河直河入邳州人民溺焉

明紀事本末

是年黃河及南直隸山東河南俱大漲秋復海嘯徐邳豐沛一望無際尙書朱衡開回回墓河上通昭陽湖湖陵城河口以洩坡水凡二千六百餘丈河道都御史翁大立奏開鴻溝廢渠自昭陽湖中以達鴻溝自鴻溝以達李家口自李家口以達回回墓而東出留城閘河計長六十餘里墾民田數千頃三月閱月告成滕沛利之按沽沛舊河湮塞朱公奏開新河比舊河徙東三十餘里然新河餘流舊河積水猶浸昭陽湖至是開鴻溝廢渠則新舊河俱得宣洩鴻溝廢渠在新河以西昭陽以東乃往年沙薛二水從此以入舊河者自舊河淤而此渠亦淤其半故廢今所開卽此

南河全考

明穆宗隆慶四年三月丁酉直隸巡按御史張問明奏留蘇松常鎮四府罰贖銀一萬兩濟河工用兼賑饑民許之四月乙巳以兵科都給事中溫純言更命河道都御史加提督軍務職銜以南直隸之淮揚潁徐北直隸之大名天津河南之睢陳山東之臨沂及添設曹濮道各兵備官屬焉七月壬辰時山東沙薛汶泗諸水驟溢決仲家淺等處而黃河暴至茶城復淤於是侍郎翁大立言今山水甚盛由梁山之下張孤山之東內花山之西南出戚家港合於黃河宜逐加開濬依山築隄以避秦溝濁河歲歲漲淤之患此所謂因勢而利道不與黃河爭尺寸之地者也工部是其議請令大立督所司相度舉行從之癸巳改工部右侍郎翁大立爲兵部左侍郎八月丁酉起原任都察院右副都御史潘季馴總理河道提督軍務此再任總河也九月甲戌河決邳州自睢寧白浪淺至宿遷小河口淤百八十里運船千餘不得進侍郎翁大立言邇來黃河之患不在河南山東豐沛而專在徐邳故先欲開泇口河以遠河勢開蕭縣河以殺河流者正爲浮沙擁聚河面增高爲異日慮耳今秋水洊至橫溢爲災臣以爲權宜之計在棄故道而就新衝經久之策在開泇河以避洪水議無出此兩者惟上決擇於是都給事中龍光御史孫裔興等皆以爲言請罰治河道諸臣責以後效令及時疏塞以通漕舟工部覆奏往時黃河自劉大夏設官布置而河南之患息自嘉靖初曹單築長隄而山東之患息自近年改成新河而豐沛之患息非必河自順軌由人力勝也今旣不能引他水以濟漕而新衝之渠卒未可就惟築塞決口如曩時房村方略則故道宜可

通至於泃口之議。雖工費不貲。而一勞永逸。比歲歲疏鑿。費亦自省。宜令大立躬自相度。條其利害以聞。其管河員俱令戴罪任事。俟河通奏請。上是之。十月庚申。總河侍郎翁大立言。臣竊計治邳闕阻之策有三。一開泃口。一就新衝。一復故道。然三者利害。恆相參焉。從馬家橋經利國監入泃口。出邳州。則可以避秦溝河徐河徐呂二洪之險。引薛河鴻溝之水灌河。水陸通行。諸驛遞分司。略可併省。而徐邳東鄙之民亦漸復業。其便者五。然而山水驟發。則須多張水門。廣開水櫃。利國監多伏石。須紆回避之。卽河已成。猶當勞費數年。而後可久。其爲不便者三。此開泃口之利害也。從曲頭集抵莊官樓。河所衝刷。久自成渠。勞費不多。而道理更近。且河入睢寧。必不南決。又無徐邳橫射之患。匙頭灣之險。而平野築隄。可免齧蝕。其便者五。然曲頭集截河大壩。費亦不貲。新隄難固。水至復決。又當廢睢寧一縣併於邳州。其爲不便者三。此就新衝之利害也。復故道則二總漕糧得水可濟。漕舟九百有餘。卽出。可以還百年運道。可以振業。徐州而存睢寧。便者四。然而百數十里之淤。視房村工費尤鉅。置沙兩涯。勢易崩塞。埽灣築隄。雖築不固。且河流所棄。多不能復。不便者四。此復故道之利害也。請以臣三策下工部定議。行河道漕司撫按諸臣協同舉事。以責成功。又言河工以錢糧爲本。以得人任事爲要。復條上計處工費。借留漕銀。議留漕米。查理船稅。起調夫役。選用官員。獎勵才賢。監督工程八事。疏下工部。仍請復故道以濟目前之急。其開鑿泃口之議。令大立熟計以聞。無持兩可。其所陳八事。多可采用。上皆允行。十一月癸亥。工部郎中張純

議以徐呂二洪之間漸成填淤。河隄寢薄。假令來年水溢。必有衝決之患。請自徐邳至淮。繕治兩涯。增高倍薄。仍築遙隄。以防不測。工部是其議。請命都御史潘季馴勘詳以聞。已而季馴言築隄之法有二。近者所以束湍悍之流。遠者所以待衝決之患。皆爲上策。顧工費不貲。動以巨萬。當此財殫力疲之會。安所措其手足耶。宜以見築縷水壩。增益高厚。曲加保護。姑爲目前之計。從之。十二月乙未。總督漕運戶部左侍郎趙孔昭上疏自劾。孔昭已得旨還部。而代者未至。會河決運阻。乃引罪乞罷。不許。壬子。戶部覆河道都御史潘季馴奏請量留漕糧三萬石。漕庫銀一萬二千兩。以河工船稅銀抵還太倉。其舊任河道都御史今陞兵部侍郎翁大立業已交代。難復行事。宜令赴京供職。明穆宗實錄。是年又決邳州。注睢寧。出小河口。自曹家口至直河。淤百餘里。命官濬之。復故渠。盡塞諸決口。明會典。

是年七月。黃河暴漲。決縣治之曲頭集。王家口。馬家淺等處。淤墊一百餘里。俱爲平陸。睢寧縣志。

庚午。河稍南徙。決睢寧。濬其陸。百五十里。皆爲平野。公復以故節來蒞事。而廢址盡復。其所浚築深厚。

再倍於故河。而費半之。出官民之舟於積淤者。以萬數。王錫爵撰潘公季馴墓志。

公塞決時。淫雨連旬。水驟至。幾沒公趾。不爲避。萬衆野處。公往來拊慰。不憚劬勞。嘗乘小艇行河。風雷

大作。震撼波濤中。幾覆。絙樹杪乃脫。父老神之。爲潘公再生。識其處。申時行撰潘公季馴傳。

明穆宗隆慶五年。二月乙亥。以河工免山東布政司及淮揚徐穎三道各派夫人戶雜繇一年。從河道都

御史潘季馴奏也。四月甲午，河復決邳州，自曲頭集至王家口，新隄多壞。五月丙戌，總河都御史潘季馴議保邳河新隄，條陳分委監督、議委官員、議處人夫、議設鋪舍、預備物料五事，工部覆請從之。八月辛丑，總理河道工部右侍郎兼右僉都御史陳大賓卒，賜祭葬如例。壬寅，命總理河道都御史潘季馴速治呂梁雙溝決隄。八月己酉，工部尙書朱衡言：國家初置漕運，悉資泉流，自景泰以後，黃河入運，奪漕爲河，緣是河身浸廣，淤沙歲積，不得不藉黃河以行，故今徐邳之漕河，卽黃河也。歷考往代，河趨濟，博則決曹、單、魚、沛，而沽頭上下諸閘盡廢，趨邳，遷則決野雞岡口、下亳、泗，而徐、呂二洪頓涸。今沛邑新河，旣成，縱決曹、魚，可保無恙，而茶城以南，猶屬黃河，非盡斥遠之，無以善後。乞將議開泇河之說，下諸臣熟計，報可。甲寅，命禮科左給事中雒遵往邳州等處查勘河工。先是，總督河道都御史潘季馴奏邳河工成，乞錄効勞諸臣。上曰：今歲漕運比常更遲，何爲輒報工完？且敍功太濫，該部覈實以聞。於是尙書朱衡覆言：河道通塞，專以糧運遲速爲驗，非謂築口導流便可塞責。乞遣官就彼覆勘，仍命季馴戴罪管事，報可。戊午，改工部營繕司郎中張純仍爲都水司郎中，以總理河道都御史潘季馴言其治河有効，特請久任故也。十月己亥，以河南、山東大水，命工部申飭管河官經理上流河防，以備衝決。辛丑，先是問刑條例有盜決，故決河防之律。在河南、山東者，俱問發充軍，而南直隸徐邳一帶，罪止徒配。至是，河道都御史潘季馴言：徐邳每歲河決之由，河流衝射，居十之四，而居民盜決，居十之六，皆以法輕易犯故也。請

著令自徐邳上下爲河流所經行處。凡有貪水利。避水患。盜決故決河防者。一如山東河南例。俱發充軍。仍增入條例中。刑部覆從其議。癸卯。命總理河道都御史潘季馴速治茶城之淤淺者。以巡按御史張守約言運船阻塞故也。十二月辛亥。罷總理河道都御史潘季馴。同原任漕運都御史陳炯。俱冠帶閒住。時禮科左給事中雒遵自邳河勘工還。爲上言運船漂沒之故。始於漕司缺船。併糧太重。故一遇水發。相隨而敗。又官旗侵冒者多。度不能償。輒妄引船壞自解。此則漕臣陳炯等之罪也。至於王家口初決之時。黃水盡從漫坡經流。南出小河口。藉令季馴稍緩築隄一月。則漕船可以盡出漫坡。避新生之險。乃計不出此。反驅舟以就新溜。坐視陷沒。方復騰章報功。罪滋大矣。今炯雖回籍。未盡其辜。而季馴尤不宜獨免。乞并賜罷。工部覆從其言。故有是命。明穆宗實錄。

是年八月。總督漕運都御史陳炯上疏。報邳州河決。漕船淹沒。戶部覆令歲漕船過淮獨早。而入閘者。十不及二三。雖河流爲梗。然諸臣怠誤之罪。亦不容辭。乞遣風力憲臣督視。以重國計。會科臣朱良佐。御史唐鍊亦以爲言。得旨。炯與總兵陳王謨。參將顧承勳。俱停俸戴罪管事。命御史張憲翔沿河督趣之。續文獻通考。

是年河決油房等十一口。都御史潘季馴役丁夫五萬。開匙頭灣塞十一口。築縷隄二萬。又挑淤八十里。故道漸復。南河全考。

是年河決雙溝。先是河漲徐州上下。茶城至呂梁兩厓東山不得下。又不得決。至是乃自雙溝而下。北決油房曹家青羊諸口。南決關家口曲頭集馬家淺閭家口張擺渡王家白糧淺諸口凡十一枝流既散。幹流遂微。乃淤自匙頭灣八十里。而河變又極矣。趙孔昭翁大立前後治之無功。議者欲棄幹河而行舟於曲頭集大枝間。冬初水落。則幹已平沙。而枝復阻淺。又議棄黃河運。而膠河泲河海運分沓。莫可歸一。於是卽家起都御史潘季馴治之。季馴之治水。惟求復故道而已。乃上言老河故道自新集歷趙家圈出小浮橋安流無患。後因河南水患。別開一道。出小河口。本河漸被沙淺。嘉靖間河北徙故道。遂成陸地。臣奉命由夏鎮歷豐沛至崔家口。由崔家口歷河南歸德虞城夏邑商丘諸縣。至新集則見黃河大勢已直趨潘家口矣。父老言去此十餘里。自丁家道口以下二百二十里。舊河形迹見在。可開。臣卽自潘家口歷丁家道口馬牧集韓家道口司家道口牛黃堙趙家圈至蕭縣一帶。皆有河形。中間淤平者四分之一。河底皆滂沙。見水卽可衝刷。臣以爲莫若修而復之。河之復其利有五。從潘家口出小浮橋則新集迤東河道俱爲平陸。曹單豐沛永無昏墊一利也。河身深廣。每歲免泛溢之患。虞夏豐沛得以安居二利也。河從南行。去會通河甚遠。閘渠無虞三利也。來流既深。建瓴之勢。導滌自易。則徐州以下河身亦因而深刷四利也。小浮橋來流既遠。則秦溝可免復衝。而茶城永無淤塞之患五利也。既報可。乃役丁夫五萬開匙頭灣塞十一口。大疏八十里。故道漸復。已而以漕舟壞。季馴閒住。

明穆宗隆慶六年正月丁卯。禮科左給事中雒遵條治運河五事。

前三條並見運河。

一自茶城以西至開封府界。

爲黃河之上源。南北兩岸長隄多缺。北徙則新河有妨。南徙則二洪告竭。且虞陵寢宜於北岸接築古長隄。以遏豐沛之衝。南岸續舊隄。以絕南射之路。一自清河至安東海口。爲黃河下流。雖有沙洲。不足滯礙。不必濬導。以費工力。工部覆奏。上皆允行之。戊辰。命工部尙書朱衡兼都察院左副都御史。經理河工。時閱視河道。左給事中雒遵言。衡當先帝時。嘗奉命治河有效。當今廷臣可使治水無出衡右者。宜暫命總理。俟功有次第。仍召還視部事。部覆從之。辛未。工部尙書朱衡疏請修築徐州至宿遷長隄。凡三百七十里。并議治豐沛太黃隄。從之。丁丑。起兵部左侍郎兼都察院右僉都御史萬恭。以原官總理河道。提督軍務。二月己丑。巡按直隸御史張守約陳言治河緩急。大略謂。全河旣復故道。修治之策。在增築隄岸。以束漫流。以防奔潰。其地勢最下者。如徐州青田淺呂梁達曲頭集六十里。直河至宿遷小河口七十里。皆宜修築大隄。工最急。自小河口至桃源清河一百四十里。宜築縷水隄。清河草灣決口宜塞。工次之。徐州至茶城四十里。宜接補小隄。茶城而上。接曹縣界北隄二百六十里。宜築縷隄。工又次之。誠量其緩急。次第修治。使河流直下。停淤漫決可免。而牽挽可施。此治河之較也。夫與其開不可必成之新河。孰若修治已通之舊河。爲力甚易。與其費數百萬開河。孰若以數十萬修河。爲費甚省。疏入。工部請從其議。上然之。三月辛亥。詔祠沿河敕建水神諸廟。以工部尙書朱衡請也。

明穆宗實錄。

是年河決拷挖灣。工部尙書朱衡河道侍郎萬恭題請創築徐呂起至宿遷縣張林鋪止兩岸隄各長三百七十里。又徐州北至茶城築兩岸隄各長三十里。漕運都御史王宗沐奏黃河遷徙不常請行河道踏勘。凡係陵寢當黃河南岸地方單薄之處務增加防捍以保無虞。南河全考

是年七月二十七日黃河驟漲自徐碭至淮揚一夕丈餘下流悉成巨浸清河山陽安東鹽城邳桃宿睢被災尤甚兩淮鹽場各衛所俱同。淮安府志

徐邳河決漂沒官船八百餘艘上遣給事中雒遵往視還奏河流易治然必大司空往乃可圖也上又以公兼右都御史經理徐邳等河悉心經畫疏汝濟之淺築徐邳之隄塞豐沛之決鑄海門之壅數月告成會穆考升遐山陵工作乃趣召公還部。于慎行撰公行狀

行水金鑑卷第二十七

河水

明隆慶六年六月戊辰。

神宗已登極矣。

輔臣高拱特請工部尙書朱衡解督理河工。總督料理山陵事務。從之。

差江西道御史周于德督理兩淮鹽課兼理河道。

七月戊子。吏部覆朱衡等守河事宜。一議官守。一

議久任。言管河官員防守修築必經歲月。駐信地方便責成。新築河隄計長三百七十里。每六十里用官一員。俱以州判縣簿領之。又添設府同知一員。與管河通判均分調督。如遇有急互相協理。其每年修守著有成效者。年終薦舉紀錄。次第遷秩。如管河主簿則陞管河縣丞。縣丞陞州判。州判陞州同。州同陞通判。其係科目者。管河通判則陞同知。同知陞僉事。遞陞參議副使。參政按察使。布政使。累著成效則直以總理河道大用之。久其任則河務愈精。久其官則河臣益勸。衡等所陳誠爲確論。詔行之。甲午。工部尙書朱衡言。國家治河。不過濬淺築隄二策。濬淺有漕。黃交會之異。濬漕黃者。或爬或撈。或逼水而衝。或引水而避。此可人力勝者。茶城與淮水會。則在清河。茶城清河之淺。無歲不然。蓋二水互爲勝負。黃河水勝則壅沙而淤。及其消也。淮漕水勝則衝沙而通。雖用人力。水力居十七八。築隄有截水。縷水之異。截水之隄。可施於閘河。不可施於黃河。蓋黃河負湍悍之性。挾川潦之勢。所向何堅不破。顧可以一隄當之。乃縷